



Universitätsbibliothek Paderborn

Ars Semper Gavdendi

Demonstrata Ex Sola Consideratione Divinae Providentiae Et Per
Adventvales Conciones

Sarasa, Alfonsus Antonius de
Antverpiae, 1664

Tractatvs VII. Ostenditur bona & mala huius mundi, bene dari etiam malis:
sic vt nec soli & omnes mali bona habeant, aut mala; nec etiam omnes &
soli boni bonis affluant, aut malis vexentur. Itaque ...

urn:nbn:de:hbz:466:1-13517

TRACTATVS VII.

Penè moti sunt pedes mei, pacem impiorum videns. Existimauit cognoscere hoc, labore est ante me; donec intrem in Sanctuarium Dei, & intelligam in nouissimis eorum. *Psal. 72.*

Ostenditur bona & mala huius mundi, bene dari etiam malis. sic ut nec soli, & omnes mali bona habeant, aut mala; nec etiam omnes & soli boni bonis affluant, aut malis vexentur. Itaque non affigat nos fortuna aliena.

P R O O E M I V M.



Agnus sane transauimus æquor, illudque diffidillum, maxima, inquam, quæ Diuinæ Prudentiæ obducendæ opponi poterat nubes, deducta est, & discussa. Scelera Diuino honori adeò non officere, ut etiam illi promouendo fuerint necessaria planum fecimus. Verùm illud adhuc complanandum restat, quod non Ethnicis solummodo Philosophis, sed & Dauidi Prophetisque humano more philosophantibus, fuit offendiculo. Ut vt sit, non impedianter scelerata, permittantur sanè, cùm Dei honor, liberumque id hominis exigat arbitrium. At verò cur quæ sunt scelerata, non permittuntur modo, sed & prosperantur? cur flagitiosis opes dantur, ceduntque omnia feliciter? si non omnibus, saltem cur plurimis, imò cur vili? an hoc non est souere scelerata? Probi vero cur contempti aut depresso, cur rerum indigi, & quidem improborum malevolentia? si non semper, saltem cur plerumque. Quid vero est virtuti officere, si hoc non est. Communissima hæc est

X. 3

mortar-

mortalium querimonia, quæque in omnium versatur ore. Cùm enim nemo se non probum aestimet, aut certè non adeò malum; rursum verò cùm nemo tam felix sit, qui sese depresso imò op- pressum malis non arbitretur, nemo etiam putat iustè se non con- queri. Iis autem vt os obstruam, ostendam primò, præclarissimis sanè ductum rationibus Deum, sceleratissimos homines felici- tate maximâ donasse. Deinde distributionem bonorum, aliter institui non potuisse, quam sic; vt nec impij omnes à felici for- tunâ excluderentur, nec boni omnes aduersâ premerentur: sed tam in bonos quâm in malos, bona malaque huius vitæ fors di- uideretur promiscue. Hoc inde demum consecuturus, vt nec alienâ felicitati inuideam, nec verò etiam infelicitate perturber.

§. I.

*Quare via impiorum prospiceret, non intelligemus perfectè, ni-
si in nouissimis eorum. Ut modò acquiescam, sufficit scire me,
Deum id sic disponere.*

*Querela de
impiorum
felicitate
exponitur.*

Communissimam, maximeque inter cœcos mortales vulga-
tam, de Diuinâ Prouidentiâ conquerendi materiam aggre-
dior. Mirantur passim homines, suis semper intenti commodis,
ecccū Deus hominem crearat tam indigum rerum omnium, tot
fortunæ casibus expositum, tot miseriis morbiisque corporis sub-
iectum, cùm facile, nulloque negotio, aut vllō suō incommodō,
potuerit hæc aliter condere & ordinare. Quod si respondero,
non sic ab initio conditum hominem; peccatum primi Parentis
intercessisse, primamque ordinationem interturbasse; ac proin-
de miserias omnes, fructus esse pœnasque peccatis debitas; hoc
inquam si reposuero, tum vero velut agmine facto, Critici illi
Diuinæ Prouidentiæ Censores inuolabunt in me, illudque tritum
roties ob os obtrudent; cur si miseræ, peccatorum pœnæ sint,
scelestissimus quisque extra miserias positus, bonis abundet,
dignitatibus turget, vitumq; agat prorsus feliciter? Quid quod
& Prophetæ Hieremiæ sit ista querimonia? *Quare, inquit, via* ^{Hier. 11.}
impiorum prospicerat? an vt soucietur impietas? Neque hoc tan-
tum; sed sint sanè felices, sint diuites, sint potentes: verum
cur

cur id permittit Deus, vt potentia sua bonos opprimant, expolient, pessumdent; quasi vero felicibus esse non detur, nisi per iustorum calamitates & ruinam. Hoccine est iustum esse, iustitiae ordinem obseruare! Aegre ferebat id vel ipse Habacuc: idcirco querelas hominum modeste Deo referens: *Quare inquit respici super iniqua agentes, tu taces deuorante impi iustiorum se?* id certe non videtur tolerabile. Castigare scelestos debet Deus; quod si nolit, saltem fauorem bonis subtractum, indecens est impiis impendere; quasi vero pro scelestâ vitâ mercedem præmiaque reportarent. Quæ demum hæc Dei est gloria, quæ Prudentia, præmiis animare scelera? quæ iustitia, miseriis vltro ingestis, virtutis studiosos exanimare, & sic virtutem tandem tollere?

2. Querelas, immò injurias, quas in Deum congeris, audio Censor importune: iniurius non libet reponere. Tamen cum Epicteto *Ego Deum apud homines defendam.* Ac imprimis, cum Dei Majestatem voces tuæ impetant, certè à Deo hæc omnia prouenire & disponi in hunc ordinem, fatearis necesse est. Procul dubio inquis, nam hoc est, de Deo quod queror. At vero, hæc ipsa, & quidem sola ratio sufficit, vt hæc omnia quietus videam, & tranquillus patiar. Si enim hæc à Deo facta est rerum distributio, certè facta quia voluit. *Omnia enim quecumque voluit, fecit,* neque voluit quicquam nisi de industria. Quod si voluit, illico iustum est quod fecit. Idem enim est iustum quid esse, & id velle Deum, ut rectè D. Cyprianus *Cuius voluntas,* inquit, *sola, tu vera iustitia es.*

*Hic refellere
du sufficere
deberet hac
à Deo sic
ordinari.*

Cypri de
Singul.
Cleric.

3. An vero sim ego usqæ adeo impudens, vt Iustitiae Diuinæ rationes sigillatim mihi exponi postulem, aut iustum id esse negem iudicium, cuius momenta omnia arbiter ego non discussero & approbaro? Enim vero quis eò dementia prouehatur, vt caussas omnes in supremo Regni Concilio diiudicatas, sibi exhibendas esse proclamet; neque iustum esse sententiam, nisi quæ sibi discussis omnibus riteque expensis, plenè fuerit comprobata? an non is risum moueat modestè agentibus, Senatoribus autem stomachum? certè vt parùm dicant, illud tamen magnâ ratione ingerent, *Quis te confituit iudicem super nos,* & quidem auctoritate publica sententiis ferendis præpositos! Hoc certè tibi longè potiori iure sanctissimæ Trinitatis aula opponet quisquis es,

es, quis te constituit Judicem super nos?

*Ordinatio
nis huius
iustitiam,
in die Iudi-
cij videbi-
mus.*

Et verò, an illud oblitus es modo, id quod modò exposui, non esse nos cō ingenij acumine, diuinorum decretoru.n rationes percipere qui possimus, nisi omnium omnino rerum circumstan- tiarumque complexus euoluantur? & hos mente tam infirmā circumplecti qui possis? Acquiesce tandem, Mortalis, quisquis es, & debilitatem tuam agnosce, tempus aperiet omnia; illud nempe, diiudicando orbi præstitutum. Nunc certè patiënti tempus est emendare quæ non possis, tunc erit iudicandi. Et quod præclarè monet Augustinus, *De hoc quoque manifestabimur, quād iusto iudicio fiat, ut nunc tam multa, ac pene omnia iusta iu- dicia Dei, sensus mentesque mortalium lateant: cum tamen in hāc re, piorum fidem non lateat, iustum esse quod latet.* Adde, & iustum esse quod lateat. Neque enim præclararam hanc Augustini sententiam sic tantùm intelligendam esse video, quasi si id velit enuntiare solummodo, nos in claro extremi iudicii die, cum manifestabuntur vniuersa, rationes omnium decretorum Dei li- quidò percepturos, ad quas nunc cœcutimus: verū & illud etiam luce clariùs nos visuros assero, benè iustāque Dei ordinatio- ne factum fuissè, vt rationes illæ nos laterent modò, oculisque nostris subtraherentur; idque vnicum debuisse nobis nunc suffi- cere, iustum esse quod fit.

*Interim
humanis
rationibus
hac nō sunt
expenden-
das et Di-
uina.*

Cæterum, si humanarum rationum trutinā rem expendimus, illud sanè cum Augustino fateri cogemur. *Ante faciem meam la- borem inextricabilem video, ut cognoscam quomodo iustus sit Deus, d̄ res humanas curet; d̄ non sit iniquus, quid peccantes d̄ scle- ra facientes, felicitatem habent in hāc terrā; pīj verò temptationibus plerumque d̄ in laboribus fatigantur. Magna difficultas est hoc scire.* Neque mitum quod Augustino difficilis visa sit hāc res. Certe de se, hāc cogitatione perculso fatetur David ipse, *Penè moti sunt pedes mei, pacem peccatorum videns. Et labor est ante me, donec intrem in Sanctuarium Dei, d̄ intelligam in nouissimis eorum.* Fateor itaque cum Augustino, inextricabilem esse laborem, scire quomodo iustus sit Deus; & rursus quod magna difficultas est hoc scire. Verū id etiam video, nullam difficultatem esse, hoc nolle scire; nulliusque laboris esse, iustum esse credere, quod ignoro, quomodo iustum sit. Nulla mihi iam indagandarum rationum incumbit necessitas: intelligam id penitus in nouissimis eorum.

eorum, cum intromissus fuero in Sanctuarium Dei, ubi caussam suam coram toto orbe acturus, & euicturus est iustus Deus: isthic video, planeque perspiciam. Iustum fuisse quod nunc facit; meum iam est, id quod rationis lumine clare conquictus iudicabo; cœcè nunc, sed piè credere. Hoc Christianum est, hoc mentis Deo subditæ & deuotæ.

§. II.

Felicitate impiorum vtitur Deus, vt nos magis in Fide confirmet, præfertim Resurrectionis & vita æterna.

6. **V**erùm, simulatque oculos mentis, ratiocinationibus humanais hâc in parte conquirendis occludo, Deus bone, quanta fese offert supernaturalis lux, quâ ingentes prorsus, diuinæque rationes discerno, quibus felicitatem impiorum rectè à Deo procurari, euidenter videam, planissimeque dijudicem? Ac imprimitus istud illico occurrit, scelerorum prosperitatem, ingentem esse confirmationem fidei meæ: liquidò enim video, aliam necessariò debere esse posthac vitam, præter hanc miseram quam nunc viuimus, vel potius infeliciter trahimus. Docet id me p[ri]mò Clemens Romanus Pontifex. *Hoc ipsum inquit, quod in præsentia vita non redditur unicuique pro actibus suis, indubitatem fidem facit scientibus, quod iudicium erit: & verò ratio id euincit manifeste.* Etenim Deo imputas, quererisque fortunati quod sunt pessimi: Deum itaque esse fateris tu, fortunas qui distribuat. Rectè. Iam verò istud vrgeo; an vllâ in parte, iustitiæ limites Deum excedere posse credis? non autumo, nisi id etiam statuas, possibile esse, non esse Deum. Quod si verò non possit non esse iustus Deus, certè non potest non punire tandem aliquando scelera, nec virtuti debita præmia semper poterit denegare. Iam verò, nonne id fateris, improbos hâc in vitâ felices esse, non castigari eorum scelera, vitam ducere iucundissimam; probos verò non nisi miseriis implicari? sanè hoc tute ipse fateris, hæc enim tibi conquerendi tota est materia. Itaque necessariò si mentem aduertis, aliam post hanc esse vitam fatearis oportet. Nam ut rectè vrget D. Chrysostomus, *vbi qui bene hic operati fuerint bonis*

Primi bonum quod ex impiorum felicitate refert ius. s[ic], est fidet confir. matio.

D. Chrys.
hom. 9, in
2. Cor. 4.

Y

boni frumentur; ubi autem mali contrariis, nisi sit futura vita quædam post hanc? Aut id planè concludendum est; aut dicendum, Deum iniustum esse posse: quod quidem dictu est execrabile; & vero re ipsâ ut sit, nullo pacto est possibile.

En, vt felicitas impiorum, quæ humanis oculis expensa, Davidis quoque pedes, quasi in lubrico positos, in lapsum impellebat, nostræ Fidei sit fulcimentum. Non intelligimus cur florent scelerati, cùm adhuc in flore sunt; *in nonissimis autem eorum intelligemus, aliam superesse vitam, alia gaudia, aliam felicitatem, aliam denique expectationem nostram, præ eâ quam nobis prætendit miseræ huius terræ fucata felicitas & voluptas;* alias denique esse miserias & supplicia præter ea quæ modo persentiscaimus & horremus. Et vero sola ea spes exspectatio sufficit, ut cum ingenti animi tranquillitate, videamus totum hunc fortunæ cursum, habilesque spes hominum, isthic depresso, isthic eleuatas, vbiique caducas. *Pacem itaque peccatorum videntes, dicamus illico. Omnis consummationis vidi finem,* finemque cùm *Psal 118.* video, felicem tandem exspecto, quem verò fortunati illi habituri sunt, id illi relinquo, qui nouit moderaturque omnia. Id certè impiorum deploranda felicitas mihi consert boni, quod fidem meam penitus confirmet.

§. III.

Felicitas impiorum iustos confirmat in Spe.

*Secundum
bonum est
augmentum
Spei.*

Quid, quod impiorum prosperitas, spem Christianam mirum in modum acuat atque extimulet? idcirco enim malis & sceleratis in hac vitâ, bona quædam largitur bonus Deus, vt toti orbi constet, quâm munificus futurus sit remunerator, tum cùm perfectis gratiæ operibus mercedem plenam *& coagitatam,* *& super effluentem daturus est Deus sibi tam chara capita æternō deuinctorus amicitiæ vinculo; cùm tam liberalis sit tamque profusus modò, vt sceleratorum sibique rebellantium quædam bona opera (naturæ tamen foetus & non gratiæ) eaque adhuc multis sceleribus intermixta, tot bonis, tantâque naturæ felicitate compenset. Cogitatio hæc diui Chrysostomi est, eoque digna deducenda.*

8.

Luc. 6.

*D. Chrys.
ho. 67. ad
pop.*

ducenda est paululum, ut percipiatur vis.

9. Illud sanè mihi facile quiuis dabit, neminem esse adeo peruersæ mentis ac perditæ, qui non aliquid agat laude dignum, quodque moralem saltem, hoc est naturæ rationique consonam sortiatur bonitatem. Crudelis ut sit Tyrannus, aliquando tamen misericordiam vicit exhibet, naturæque propensio insitam animo emollit ferociam: neque qui in omnem luxuriam projectus est, idcirco iustitiam non colit; neque qui iniustus, alia humanitatis, imòne Religionis quidem erga Deum, deserit officia: Res hæc in confessio est. Attendite nunc genium indolemque Dei: certe tam generosa est, ut ea ipsa qualiacumque bona opera, nolit omnino abire indonata: id verò in alterâ vitâ præstari cùm non possit, utpote ab omni felicitate isthic extoribus; in hâc confert quidquid postulari posset præmij, ne quidquam omnino fauoris, in alterâ post hanc vitâ, quasi iure aliquo possit expeti, aut bonum aliquod opus in rationes computumque deduci. Quod si fuerit peccator aliquis, verba sunt Chrysostomi sexcentis malis cooperitus, *Et qui in pluribus illorum, insanibili morbo labore, qui rapiat, qui fraudet, idcirco prospero rerum successu frui- tur, ne mercedem isthic repeatat.*

10. Contra verò, cùm iustum vides affligi, illud tecum reputa, neminem adeo accuratum esse, qui non aliquando à recto deflectat tramite; neque adeò bonum, quin aliquid aliquando faciat mali. Idecirco hic patitur inquit Chrysostomus, *ut purus hinc abeat, nihilque puniendum restet.* Quod sanè præclarè Lazarus confirmat exemplo. *Quoniam ergo, inquit, Et Lazarum habere quedam peccata contigerat, Et diuitem aliquod bonum habere: propterea dicit Abraham, nihil hic require, bona illic Tua recepisti, Et Lazarus mala sua.* & ne quis id me ita dicere credat, inquit Chrysostomus, certe ipsissima Abrahami verba sunt *Tua nimirum & sua*, hoc est, quæ tibi debentur, & quæ Lazaro. Quod vt euidentius declareret Abraham, non dicit *Accepisti*, sed *Recepisti bona tua*: nam quod accipitur non semper debetur, debetur autem quod recipitur. bona itaque quedam debebantur Epuloni, Lazaro autem quedam mala. En verba Chrysostomi, Epulonem alloquitur. *Fecisti aliquid boni? recepisti opes Tuas, sanitatem Tuam, delicias, potentiam, honorem: nihil debetur, recepisti bona Tua.* Tum ad Lazarum orationem deflectens. *Quid igitur? nihilne*

Impiorum
hic Deus
felicitate
quadram
bona opera
remunera-
tur, ut po-
stea plenè
cattiget eo-
rum mala.

Iustos hinc
Deus ob-
quadram
ipsorum ma-
lare castigat,
ut potius
plene re-
muneretur

Chrysost.
hom. de
aduersâ
valetud.
tom. 5.

ibid.

Luc. 16.

Y 2

nihilne

nihilne Lazarus peccauit? imò vero. Et Lazarus similiter mala scilicet sua recepit. Cum tu Tua bona recepisti, tum Lazarus mala, idcirco nunc iste consolatur, Tu vero cruciaris. Iustè omnino, & rectè, cum enim Lazarus, pro perperam factis, patiendo satisfecerit; puniri non potest, nihil debet: cumque pro rectè factis nihil ei admodum sit persolutum, adhuc ei debentur omnia. Tibi vero pro bene gestis præstata cum sint omnia, nihil debetur præmij: at quia debitorum suppliciorum nihil exoluisti hactenus, in pleno ære Dei es, debes omnia, & quia æquitas id exigit, solues omnia.

*Non igitur
tibi blan-
diantur
imp̄ si hic
sint felices.*

Mentem hoc aduertite, quoctunque fortunati esse vultis & dici. Fortunati si estis, & nihilominus Dei hostes & peccatores; huius æui, terræque fortunatos vos credite; non alterius & æterni. Duret, si fortuna sic fert, eō quō viues tempore, fucata illa quā deliniris felicitas; at vero æternitate totâ tibi quid fiet? Bonâ dat nimium tibi benignus Deus, diuitias largitur, dignitates impertit & honores; tuque diuinis beneficiis, in iniuriam benefactoris abuteris. Non percipis interim irati Numinis esse timenda beneficia? Nihil deliciarum, nihil felicitatis tibi detrahit, vt nihil tibi debeat, si fortè rectè quid egisti: rationes interim tecum pro sibi à te debitissimis initurus, vti liquidissimas, ita & rigidissimas.

*Largitur
enim felici-
tate hanc
Deus, vt
postea di-
fricilius in-
dicet &
punit.*

Vin plura: certè cum Dei arcana consilia tetigerimus, illud etiam dicam vt aurem tibi vellicem, nimiumque ne tibi de felicitate blandiaris. An nescis diuitias, fortunasque eō consilio tibi à Deo submitti, vt maiori vt sic dicam animo, te in extremo totique orbi conspicuō iudicio arguat, securiusque condemnet? Cur sic inquires? dicam. Causa suæ æquitatem, omnibus creaturis conspicuam facere cum statuerit; idcirco felicitati tuæ, cum possit; nihil detrahit; vt omnibus constet, nihil omnino rationis afferre te posse, cur eō audaciae prolapsum sis, vt tam beneficium Numen te non puduerit iniuriâ impetrare, eiusque tam iusta imperia detrectare. Felicem te facit, quamuis peccatorem, vt tandem aliquando *instinetur in sermonibus suis, & vincat psalmi cùm iudicari.*

Audi Ambrosium hæc in Iudâ exaggerantem. *De Iudâ Prodigatore,* inquit, *hæc colligere licet: qui & Apostolus inter eos electus est, vt loculos pecuniarum, quos pauperibus erogaret, commissos habet;*

11.

12.

13.

Ambt. I.
9. offic. 15.
ret;

ret; ne videatur quasi in honoris, aut quasi egenus Dominum prodidisse. Quid deinde? Et ideo ut iustificetur in eo Dominus hec ei contulit, ut non quasi iniuria exasperatus, sed quasi preuaricatus gratiam, maiori esset offense obnoxius. Optime Ambrosius & Iudæ & tibi. frustra id iam quidem Iudæ, nisi quod Iudæ, id & tibi diceretur, quisquis es peccator, & cum dici sic ambiat, peccator fortunate. Quod si rerum omnium egenus fuisses, certe tot furta, iniustasque technas, paupertati depellendæ aliquo saltem modo poteras imputare; Quod si calamitatibus, dedecore & ærumnis te Deus oppressisset, vindictæ de tam seuero Domino sumendæ causâ ei te bellum indixisse, legesque tibi impositas excusisse, malè quidem, tamen in speciem potuisses obtendere: at iam quid dices? quòd te vertes? quid afferes excusationi? quomodo causam tuam orbi iam probabis? Nescio sane. Illud videt

Deut. 32. orbis vniuersus quod incrassatus est dilectus dicitur recalcitrauit; incrassatus, impinguatus, dilatus, & nihilominus, dereliquit Deum factorem suum, dicitur recessit a Deo salutari suo. Habemus fatentem reum, & eō tacente res ipsa loquitur; cuiuscaausa est: itaque veniat mors super eos dicitur descendant in infernum viventes. Percipitis tandem, cur malis bona det bonus Deus? ut iustificetur in eo Dominus, & causam suam contra omnes obrectatores euincat, cum iudicarit.

14. Nunc vero ad vos mihi sermo est. Auditores. Quisquamne inter vos est, qui operum suorum sibi mercedem integrum in hoc mundo præstari desiderat, plenamque omnium quæ sibi debentur præriorum apocham, nihil ultra petiturus velit dare? Felicem modò te hīc reddat Deus, vis ei cœlestem, quam tibi daturus est gloriam transcribere, & omne debitum condonare? Minime vero inquis, absit hoc à me. Sapis profecto, sapis. Iam vero, an etiam adeo amens sis, ut vel minimam débitæ mercedis partem, & ut ita dicam atomum velis concedere, in hoc mundo fortunatus ut sis? terrena gaudia cœlesti gloriæ, corporis comoda deliciis animæ, æternis peritura ut æquipares, imo ut præponas? non arbitror adeo insanum te, nec tibi ipsi tam iniunicum. Quod si igitur æterna tanti facis, quid tantopere conquereris, terrena quod tibi deneget, ut plena & integra tibi stet merces isthic soluenda, ubi cum datur quod debetur, debitum tamen numquam extinguitur? Cur non tibi ipsi gratularis cum

*Interimius
stus sepe
futuri ex-
pectations
conferunt.*

affligeris ; certus te, quæ debes supplicia patiendo delere, sic ut omni ære alieno liber, creditor ipse debitorem Deum possis liberâ & exponere à fronte conuenire ? Sanè hâc spes fatus, ridebat miseras omnes laboresque diuinus Paulus. Bonum inquit, ^{2. ad Cor.} certamen certani, hoc est multum mihi desudandum fuit, non ^{4.} parua certamina sustinui, cursum consummavi, fidem seruavi. In reliquo deposita est mihi corona iustitie, quam reddet mibi Dominus in illâ die, iustus Iudex. Re却itam nimis gaudet coronam integrum, & reseruatam mercedem plenam, cuius admodum nihil in hoc mundo receperit : certo tamen recepturus, quia justus est is, qui debet laboranti præmium ; & benignus, æternitati illud cùm reseruat.

Interim fatere modi, abs re esse quod conquereris, prospera sceleratis, aduersa piis cedere, fateberisque, sat scio, mentem Dei consiliumque si, prout exposui, intellexeris.

Felicitas impiorum magnitudinem celestis Glorie demonstrat.

Patere igitur felicitatem eorum, tibi tam utilem,

Tertii bonum, quod ex impiorum felicitate, eterna gaudia detur intelligere.

Adde quod ex eâ quam tantopere miraris sceleratorum hominum felicitate, cælestis quæ nos manet gloriæ magnitudinem, datur coniucere & inuestigare. Age sis, & quidquid terra fert gaudij, quidquid deliciarum Imperatorum aulæ, quidquid diuinarum expoliatae armis Prouinciae, quidquid dignitatis euecta per vim fastigia, homini quem tu fortunatum vocas unquam contulere, ob oculos tibi propone, & si potes mente concipe : theatrorum acclamations, conuictorum luxus, chorearum gaudia, luxuriantium inanes risus, & steriles cachinnos ; quidquid denique immoda conferre potest fortuna, cogitatione designa. Designasti ? iam vero sic tecum, imò mecum ago. Quod si tam munificus, imò tam profulus est Dominus, iustus tamen Iudex, ut bona quædam opera, naturam tamen non exceedentia, & quidem tot tantisque sceleribus contaminata compenset ; quæ demum erit illa gloria, quæ deliciæ, quæ corona, quæ gratiæ perfecta opera, hoc est, Sanguinis a Deo homine profusa merita

merita compensabit? Si tam bonus est tamque liberalis erga hostes, Majestatis suæ iura per summum nefas infringentes; quæ tandem reposita est corona diligentibus se, quæ hæreditas filiis, per Filij sui dilectissimi Sanguinem adoptatis? Si talia impertit gaudia in exilio constitutis, in hanc lachrymarum vallem allegatis; quæ denum serenitas erit in montibus æternis, in centro voluptatum, ubi flumina deliciarum letificant ciuitatem Dei? O Ierusalem cœlestis! Domus Dei! ciuitas sancta! patria dilecta! qualem ego te contemplor, cum exilij huius felicitatem aspicio!

17. Contemplari eam veluti in ænigmate possumus Auditores, cā frui necdum possumus; descendendum est itaque ē montibus illis æternis, quos iam mente conscendebamus: vallemque nostram repetentes, illud nobiscum iam reputare, quanti momenti sit, ingentem, de Deo Diuinisque decretis animo imbibisse opinionem? Cū semel illud tamquam indubitabile statuerimus, bonum esse & rectum quidquid aget Deus, illico rationes sese magnâ copiâ offerunt, quibus singula defendamus. Adeo verum est, vt expolui, illud Ecclesiastici *Qui timerit, hoc est, qui reveretur Dominum, inueniet iudicium;* *Iustitiam nempe Dei,* quasi lumen accendet, vt plurimas inueniat rationes, quibus, iustum esse, quod non dubitabat iustum esse, rationibus conuictus asserat, & conuictum sese gaudeat. Nihil adeo videbatur difficile, quām intelligere quo pacto iustus sit Deus, impiorum votis cum obsecundat; & tamen iustum id esse postquam statuimus, quām facile fuit iustitiaz ante tam incognitæ rationes conquirere & inuenire?

Acquiesce
igatur tan
tus ordin
nationibus
Dei.

Neque tā
tum inge
nere patia
rus impios
felices, sed
etiam hunc
impium in
particulari
quælibet of
fendicula
est.

18. Has itaque mente generatim complectentes, quæcūc post hac, neque quidquam vltra inuestigate: sint felices modo, sint fortunati, sint diuites, fluant ex eorum votis omnia; qualia fuerint vota intelligez in nouissimis eorum. Neque quod iustum esse in omnibus sceleratis generatim creditis, id de nefario quopiam particulatum amplius exquirite: neque cur hunc Tyrannum fecerat Deus, cur hoc scelus non impediatur, cur nefarius hic tam ample dominetur. Superfluum est quæstiones erismodi, specialiter instituere, ubi de iustitia generatim constat. Verum id video, homines plerumque non tam de sceleratorum bonis generatim, quam de huius, nefarij qui præ oculis est, de huic impudici, de

huius

huius truculentis à quo quis opprimitur, felicitate angusti & potentiā dolere. Hunc sublatum vellent, hunc deprimunt, hunc in ordinem redactum. Sint sane in Indiis tyranni, sint impii in Iaponiā felices, dominentur isthie scelera, parva de hoc nobis est curatio. Aīn verò tu? Certe iam perspicio, non Dei gloriam, sed tuum incommodum has querimoniās expressisse.

*Hic enim
Deus fecit
vult, ut
per eum te
castiget.*

19. Quod si nihilominus Diuini honoris assertorem te dicis, eiusque gloriæ cupidissimum; sis sane, & permitte Divis cetera. Punit eos Deus, deturbabit de gradu, fastum coercedit, tum cum id erit ei gloriosissimum. Tu dehac re, ne cura. Interim id modò ad gloriam Dei conduceit maxime, vt modò affligaris tu, vt opprimaris, vt mala sustineas, & malos feras patienter. Haec Dei laus est, hanc a te expectat. Idecirco hoc scelus, hunc proteruum patitur, vt tibi per eum patientia materia, sibi vero laudis per te detur. Poenas nonnunquam es commeritus: nefarius hic flagellum est, virga est quam castigaris, vt post hanc miseram vitam, nihil tibi soluendum restet. Patere flagellum esse: castigato filio; flagellum fit ignis pabulum, filio hereditas ex asse reseruatur.

*Eum casti-
gaturus
suo tempo-
re.*

20. Iam vero, si nefarius ille virga tua est, cui conquereris eum tam potentem esse, florere opibus, florere fortunā, florere dignitate? Virga est, & quæris cur floreat? vt tibi magis doleat, eam cum percuteris. Quid ergo! Virgam esse vis siccā & emarginā? Et quae tum tibi daretur patiëntia materia, quod virtutis exercitium? quae castigationis erit utilitas, vbi doloris non est sensus? Floreat sane virgæ, florent; & vt florent, succum è terrâ trahant, baccis turgeant, in folia sese distendant, sint conspicuae, sint videntes, sint floridæ; tempus erit cum cuncta diffluent, nihilque futuræ nisi flammis deuouendæ victimæ; filiis castigandis quondam utiles, ceterum posthac inutiles futuri rami.

*Tempus au-
tētu Deo
ne prefcri-
be.*

21. At inquires, longinqua est haec spes, nimirum durant virgæ haec: cur non abiciuntur modò, cui tam diurna eis felicitas? Ah querulum hominum genus! Longum tibi videtur tempus hoc quod exigimus? Audi Augustinum. *Quod tibi videtur longum, breue est. Vis esse longanimitis? junge te eternitati Dei. Nam atten-
dis ad dies tuos paucos: d' diebus tuis paucis vis impleri omnia.
Quae omnia? ut damnentur omnes impii, d' coronentur omnes pii.*

*Aug. in
Psal. 91.*

An

An non id video, contra omnem rationem id velle te? id enim vis, vt maxima pars orbis pereat, viuente te. Non hoc volo inquietus, vnicum tantum, illudque scelestum planè caput diris deuoeo: hoc si aufertur, plana mihi posthac sunt omnia. Næ tu cauissam tuam, sed non Dei, agis præclarissime! At verò non id perspicis, eodem prorsus modò alium de aliò, sibi æquè ac tuus tibi infestò, tertium de tertio æquè vt sibi videtur sceleratò ac tuus tibi, conquesturos? Nemo certè ferè unus est, qui non aliquem sibi habeat infestum, quem sublatum cuperet, eodem quò tu iure. Neque verò tu ipse is es, quem non aliquis sibi obstatu lo esse retur, licet id nescias. Quid ergo? an illico omnia destruenda sunt, vt conquerentium votis Deus satisfaciat? Certè & tu in numerum eorum venies, quos de medio tollendos statuit humana fatuitas. Ridicula hæc planè sunt, & indigna quæ tranquillitatem nostram perturbent vota. Florent, vireant scelerati, castigantur, deprimantur; verùm Deus, vt ait Augustinus, *impluat ea in tempore suo*, hoc est tempore à se præstituto. Tempus nostrum angustum est nimis & breue; & angustior nobis adhuc mens est, quam vt se ad ea que Deus posuit in suā potestate tempora designanda queat extendere, & explicare.

§. V.

*Reclamè tamen nec solis malis bona, nec solis bonis mala eveniunt:
vt hinc dicas, nec quæ vocantur bona, vera bona, nec quæ mala, verè mala esse. hinc utraque aestima prout sunt, non prout nominantur.*

HAec tenus bellè. Verùm inquietus, illud exinde rursus exsurgit difficile, quod nec omnibus sceleratis fortuna semper favat, nec iustis omnibus sit aduersa: & rursus plurimi impij miseriis ingentibus implicitur, vbi boni quamplurimi sunt in deliciis. Quid hic repones? Prudentiam Numinis hic quod pactò vendicabis? Difficultatem hanc magnam sibi proposuit, in omnibus magnus Augustinus. Nunc verò inquit, quando non solum in malo sunt boni, *Et in bono mali, quod videtur iniustum;* *Z* verum

*Quaritur
cur bona
& mala
huius vita
datur sue
fisi & im-
piis promi-
sene.*

*Aug. 1. 10.
de Ciu.
c. 2.*

verum etiam plerumque (quod quidem est verissimum) dicitur malis mala eveniunt. Et bonis bona proueniunt; magis inscrutabilia sunt Iudicia Dei, dicitur inuestigabiles via eius. Alio vero loco explicatur. Non enim soli boni plena habent domos rebus necessariis; aut soli boni vel salutis facti sunt, vel ab egritudine conualescunt; aut soli boni filios habent, soli boni pecuniam, soli boni cetera apta hanc vitam temporali atque transeunti: habent hec dicitur malis; dicitur aliquando de-sunt bonis, sed desunt dicitur malis; dicitur plerumque istis magis quam illis, aliquando illis quam istis potius abundant. Permixta ista temporalia Deus esse voluit. Inscrutabilia quamvis haec Dei judicia, inuestigabilesque vias dicat Augustinus, ipso tamen duce, difficultatem hanc ut spero superabimus, cum summam Diuinæ Prudentiæ rationem intelligimus.

Ratio pri-ma D. Gre-gori, ut nemo sibi de felicitate blandiatur,

Vrget difficultatem D. Gregorius, eique enodandæ lucem aliquam rationemque præfert, quæ non parùm felicium animos domet, voluptatemque nimiam infringat & temperet. Audi Gregorium. Cum bonis hic bene est, dicitur malis male; incertum est valde, utrum boni idcirco bona accipient, ut prouocati ad aliquid melius crescant; an iusto latenteque Dei Iudicio, hic suorum operum remunerationem recipiant, ut à premiis vita sequentis inanescant; dicitur utrum malos, idcirco aduersa feriant, ut se ab æternis suppliciis corrigendo defendant; an hic eorum pena incipiat, ut quandoque complenda, eos ad ultima gehenna tormenta perducat. Ideo, inquit, justis felicitas semper suspecta est: verentur enim ne mercedem, quam in cælis expectant, hic cælō excludendi recipient. Vnde fit, verba Gregorij sunt, ut sancti viri magis in hoc mundo prospera, quam aduersa formident. Ratio D. Gregorij, si hominem attendas, optima est; cùm enim incertum nobis sit, quem tandem exitum sortituræ sint res nostræ; suspecta semper nobis esse potest, præsertim nimia prosperitas, ne ea sola sit merces operum. Atque hinc coniçere licet, quæ ea tandem sint bona, quæ tam tristem data sunt ingerere suspicionem.

Ratio 2. D. Augu-stini, ut di-scamus esse bona bonis propria, & mala pro-pria mala.

Verum, cùm Ds sit perspicuum qui demum felicem habi-turi sint vitæ exitum, qui vero infelicem; adhuc id explicandum restat, cur non omnibus bonis bona, malis autem mala tribuerit. Si enim terrena felicitas bona est, certè non aliqui prorsus boni, ab ea penitus fuerant excludendi: si mala, omnes pla-nè mali, & non aliqui tantum illâ fuerant castigandi. Hunc no-dum

AUG. I. 20.
De C. 4. 2. dum sic, & sanè feliciter, soluit Augustinus. *Quamuis ergo nesciamus, quomodo Deus ista faciat vel fieri sinat, apud quem summa virtus est, summa sapientia, summaque iustitia; salubriter tamen discimus, non magni pendere seu bona seu mala, que videmus esse bonis malisque communia: & illa bona querere, que bonorum, atque illæ mala maximè sugere, que propria sunt malorum. Quæ demum ista sanè, virtus animi, diuinaque Gratia, tam quæ actualis dicitur, quam quæ habitualis est, animamque sanctam facit, & ius Gloriæ tribuit, in hâc vitâ sola bona sunt, bonis propria: in futura verò, ipsa Gloriæ consecutio. neque præter hæc, illa bona sunt, quæ boni tam præclarò nomine mereantur appellari. In iustis propria mala sunt, mala mentis affectio, peccatum, & hoc consequens Gratiaz sanctificantis, hoc est, iuris ad cælestè regnum amissio, perpetua denique peccati merces, condemnatione. hæc mala adeò mala sunt, ut sola mala sint.*

25. At quis id crederet, inquires? nemo non aliter sentit. Sic est. Verum cum bonitatem peruersitatemque rerum discernere Dei solus sit, cui, quid quæque res sit, intimè & soli penitus est perspectum; eius certè, nisi decipi volumus, iudicio decidenda est hæc res, & non opinione vulgi, temerario rerum arbitrio. Igitur quid iudicat Deus? vide quid egerit. mala dat hæc quæ tu dicas bona, nec tamen omnibus mala itidem, ut vulgus ea appellat, bonis immittit, nec tamen omnibus, nec etiam solis. Cur id agit? dicam cum Senecâ, nescio an ex commercio cum D. Paulo, lumen ei aliquod naturam superans adhæserit. *Hoc, inquit, est propositum Deo, sapienti viro ostendere, hec quæ vulgus appetit, que reformidat, nec bona esse nec mala: apparebunt autem bona esse, si illa non nisi bonis viris tribuerit; & mala esse, si malis tantum erogauerit. Quid præclarius commendandæ Dei Prouidentiæ dici potest? quid ad recte de rebus ex Dei mente iudicandum, asserti poterat illustrius?*

Sen. I. de
Pron. c. 5. 26. Nugæ sunt profecto, & ad triuia, stolidamque faciem omnia tumultu peragentem, ableganda sunt hæc voces, mala est paupertas, mala liberorum amissio, mala dignitatis iactura, mala plebis seruitus, mala ægritudo, mala mors. Neque minus illæ corrigendæ sunt, quibus recta valetudo, honores, diuitiæ, corporis commoda, liberorum procreatio, & cetera his similia, à vulgo Bona per errorem sane grauissimum, nominari solent. Ex-

Ratio 3.
Seneca, ut
ostendat
Deus, hec
qua vulgo
vocantur
bona &
mala, non
esse quod
vocantur.

Hoc proba-
tur.

pungenda, inquam, sunt hæc nomina, quæ nihil habent sei, ap-
paratus vero mendaciique plurimum. Hoc certè nos doceat
Dei, ea prout sunt & non prout appellantur, distribuentis au-
thoritas. Si enim accuratius rem perpendimus, certè si bona ea
essent, vera & sincera, quæ vulgus inconditum dicit bona, an ea
sinceris sibi que dilectissimis amicis, hostibus suis danda, subtra-
heret, amicitia tam exactus cultor Deus? Rursus, si vera mala
sint quæ passim dicuntur mala, an non illa hostibus suis punien-
dis impenderet, quibus iam amicissi num quemque saepenume-
rò exercet? Denique si bona sint quæ vocas bona, an ea quibus-
dam amicis tantum, nec tamen maximis, impertiret; his vero
quibus familiarissime vtitur prorsus inuidet? Absit hoc à Deo
si iustus est, si sincerus est, si amicis verè amicus est. Quod cùm
certè sit, & ita quidem sit, vt non possit non esse id quod est,
cumque putatitia illa tum bona tum mala, passim bonos inter
malosque dispersa à Deo, sic quasi temerè, videamus; fateamur
certè, neque morbos mala esse, neque tentationes mala, nec ege-
statem, nec aduersam fortunam, vera mala esse; nec rursus pro-
speram sortem, diuitias, delicias corporis, commodam valetu-
dinem, honores, & quidquid natura adamat, esse vera & solida
bona. Res manifesta est, de nomine laboramus. Ut quid ergo
tam honestò nomine passim compellantur? Dicam: quia passim
gaudemus decipi, & decepti in errorem alios trahere; ne soli de-
cipiamur, mendacia nobis inuicem miseri imponimus, & quod
miserrimum est, mendaciis delectamur. Ut autem mendacio fu-
cum detrahatur, promiscue tum bona tum mala distribuit, æqua-
rum expensor Deus.

Tum in-
strumenta
sunt unde
acias bene
vel male.

Quid ergo sunt, inquieris, si nec bona sunt, nec mala sunt? il-
lico respondeo, instrumenta sunt quibus mala possis agere, &
vero etiam bona. Quis enim id mihi persuadeat, diuitias mala
esse, quibus video humana commercia sustineri, tot opera pietatis
misericordiaeque exhiberi, templa construi, religionisque di-
gnitatem sustentari? Quis vero ea mihi bona esse obtrusurit,
cùm illud liquidò constet, ex iis rixas fere omnes, lites, periuria,
inimicitias priuatas inter homines, inter Principes vero bella et-
iam crudelissima exoriri? Contra vero quis paupertatem mihi,
tanquam bonum, recte commendauerit, quam tot furtis, tot ra-
pinis, tot homicidiis prouinciarumque deprædationibus ansam
dare,

dare, quotidie experimur? Rursus quis Malum esse paupertatem affluerit, ex quâ omnis in Republicâ officiorum, artiumque nata est varietas, prout sequenti Tractatu demonstrabimus? Tandem clare id perspicio, per morbos, per ærumnas, per egestatem, per omnia denique quæ dicuntur mala, plurimos cœlum petere, & obtinere; plurimos etiam miserias has, æternis comutare. Neque id etiam obscurum est, sed planè manifestum, diuitias, honoresque quibus plurimi ad inferos degrauantur, aliis id felicitatis præstisſe, ut perituis aliquando diuitiis, æternas numquam extingendas emerint & comparant.

28.

Quid ergo tandem dicendum est, quomodo loquendum. Sic statue & dic, omnia & bona esse posse & mala; bona, si bene iis utraris; si male, mala. Mala itaque non sunt, sed cum sunt, tu facis mala; bona vero cum fuerint, bona certè ut essent, tu fecisti. Rectissime Augustinus: *Omnia ista bona sunt, sed unde facias bene, non que te faciant bonum.* Addamus nos: tum vero si es bonus tu si ex eis, aut per ea facias bene. Penicillus neque bonum facit pictorem, neque adeo malum; bonus utcumque sit, malusque ut vulgo loquimur penicillus. Illò qui bene vtitur, bonus est Pictor, qui male, malus; neque præstantia instrumenti artificem commendat, sed rectus usus. Ita sunt omnia: instrumenta sunt, usus vero bonus an malus ut sit, id penes te est. Non igitur mihi post hac importunus quisquam obstrepat, quæratque cur Bona Deus, hoc est, instrumenta virtutum cur promiscue bonos inter & malos distribuerit. Illud si vult petat, cur tam peruersè instrumentis sibi à Deo subministratis vtantur scelerati; & hoc in Dominisui dedecus, suamque perniciem conuentant, quòd bene laudabiliterque poterant frui. Tum vero statim regeram, id quidem ex maleuolo hominis arbitrio, maloque libertatis ingenitæ usu ortum trahere, non vero ex hoc capite, quod non summâ cum prudentiâ, summoque consilio, vt iam vidimus, hæc quæ vulgus vocat bona aut mala, bonos inter & malos promiscue fuerint distributa. Maneat igitur, diuisionem, hanc tam æqualiter inæqualem, bene recteque institutam.

Aug. ser.
3 de SS.
Janoc.

Quod si et
go bonis
male ut
tur impj,
non id Deo
i imputan-
dum sed
vitio utri-
tum.

§. VI.

Ostenditur diuisiōnē illam fortunārū aliter iñstitui non debuisse, adeoque nec potuisse, nisi eo modō quō iam facta est.

Itaque ne felicitati aliena inuidet, et alienis malis acquiesce.

*Acquiescēdum est di-
stribuēdūt
bonūt. &
maloūt
prōmissūt
prōprium
est factūt.
Dona
regalēt
autem
Probatur,
quia nemo
homo ca-
pax est, qui
sigillatim
et bene,
qui in d
aliter ea
distribuat-*

Quid iam vobis est animi, quis sensus Auditores? an posthac tritum illud sed ut parum dicam, temerarium oggeretis, 29.
Quare via impiorum prospicitur? acquiesceris ne iudicio illius qui
dat omnibus prout vult, neque vult quidquam, nisi quod æquum
est? Bene est. Altius tamen libet ascendere: non enim diuisio-
nem hanc fortunārū tam promiscuam, iustam solum esse con-
tendo, sed nec aliām esse debuisse, adeoque nec potuisse, aliter
iñstitui. Causa securus id comitanter assero.

Hic vero subrides tu, sat scio, humeros contrahis, supercilium eleuas & frontem rugas. Aliquid, ut video, n̄c tibi non placet; non visquequaque à Deo actum est bene. Verum age, conservamus manus si placet. An vero tu, superciliosus Censor, cui nullum non admordere sunt deliciae; an tu tibi tam amice abblandiris, ut fortunām cuique suā, te melius confitaturūm fuisse tibi persuadeas? Tentanda sane hac res est, erroremque sum si fieri potest, dedocendus tandem Deus. Illud itaque sic statue, omnes omnino quotquot in orbe sunt diuitiae, omne aurum argentumque quod aut fert India, aut quod ex terræ visceribus hactenus erutum totò vagatur orbe, penes te esse sequestratum: nihil pretiosi esse, quod non in manu tua sit erogare, distribuere, retinere prout libitum fuerit: ceteros omnes pauperes esse, omnium egenos, nihilque expectate nisi a te. An tibi sat virium, imo sat sensus & iudicij esse arbitraris, diuisiōnē hanc qui positis, non dico absoluere, sed vel instituere & inchoare? Si non, quid conquereris id factum, quod ut velis emendare tamen non possis? Si etiam; itaque rem ordire, si placet, neque fam verbis, sed rebus ipsis dirimamus rem.

*Ostenditur
id experie-
tiā fidūt ad
rem.*

Dic igitur sodes. Quis primus esset, cui diuitias assignares? Egomet ipse, inquis. Facis profecto non illepidè: à se ipso enim charitas incipit, ordinata ut sit. Verum quantum æris, quantum auri

30.

31.

30.

aurei & argenti ex totâ congerie extraheres, tuosque in thesauros consignares? Quot fœsterium millia? auri quot millions? non enim nisi vnicā tantum vice potes eligere, ne numquam absoluamus rem. Quid hæc in ipso limine? quid tam cito dubitas? an iam subducendi sunt calculi? an prius statuendum, quantum habiturus si familiam, quot præreaturus sis liberos, quam obturus dignitatem, quæ expensæ faciendæ, priusquam id scias quæ tibi sint sumptibus sufficiatæ diuitiæ? Id vero si prius statuendum est tibi, age cogita tecum ipse, antequam de te quid statuas. Verum ut totius orbis expectationi facias satis, te pro hac opportunitate præterito, ad prospiciendum cæteris abeamus, ne totus, si diu morandum est, in te irruat offensus orbis. Si tamen de te ipso statuere certi quid non possis, quid alijs facturus sis, facilis iam est conjectura. Pergamus tandem ad ceteros.

32. Dic saltem amabo; quis ex omnibus quotquot sunt hominibus, à te secundus erit, cui partem suam munificus assignes? Quid rursus hic circumspicis, quem tandem designas oculis? En fratrem tuum hic penes te: nullus sane hoc tibi coniunctio naturæ & sanguine. Quid caput moues? Frater, inquis, est, at noui fratrem: cum nempe qui mihi parentum amorem blandiciis falsimoniisque subtraxit perfidus; iam me adorat, à me cum totus pendet. Noui ingenium viri, hercle, indonatus mihi abibit hodie; recedat modo, cras video. Næ tu elatō nunc es animo vir bone, fortunarum factus arbiter. Verum si tam cito lites moueantur & jurgia, quando demum finienda est hæc distributio, quam ne quidem datur incipere? An non hic expectandæ sunt totius orbis querimoniae & clamores execrantis te reipublicæ, laboranti mundo quod non subuenis?

33. Verum stultus ego sim & demens, lateri tuo si adhæream, speremque te quidquam acturum rectè, nisi prius quid cuiusque ferat genius, quid necessitas, quid filiorum futura multitudo, quid vnicuiusque ætas, quid vita diuturnitas, quid dignitatis ratio, quid bellorum impetus, quid fortunæ futura varietas, quid negotiorum euentus, quid hominum bonis insidiantium perfidia, sint allatura, probe penitusque perspiceris. Hæc autem omnia perspicere te posse putas, homo minimæ mentis, & projectæ audaciæ: sine quæso, sine Deum agere res suas, imo & tuas,

*Eam capa-
citas ho-
minum pro-
batur à
priori.*

tus, momenta cui omnia, necessitatesque penitus sunt conspicua. Agat ille prout placuerit, qui agit omnia *in pondere & mensura*, qui *gratias suas diuisit prout vult*, vult autem quod videt viribus, genio, natura, temporis, maxime accommodatum; quod aeternae saluti procuranda maxime conueniens. Ad has leges omnia attemperauit: has quia non attendimus, ad omnia cœcutimus, nec tamen cœcitatem præfacti agnoscimus.

Lubet tamen eam prorsus detegere. Adhuc enim obmurmuras, sat scio, illudque tibi ipsi tacitus dicas, saltem illi (& aliquem mente designas) bona tanta non committerem, in manu si foret mea. Sceleratus est, impius est, fastus nimius deprimendus est. Bene habet; verum & hoc quoque alius de tertio conqueritur, alius de quarto; & sic denique nemo homo est, qui non queritur; nemo homo, de quo querimonia non deponuntur. Quod si querelæ iustæ sunt, sane nihil in toto rerum ordine, a Deo factum est iuste. Igitur emendemus omnia, restituamus ordinem, & ne querelis detur locus, studia conferamus, iustumque tandem instituamus rerum omnium diuisionem. Attendite nunc quot, 34.

quot estis mortales: sacer Senatus iam coactus est; res intus agitur magna: de lege inquam agrariâ, & argentariâ, Senatus humani consulto, peremptoria ferenda est sententia.

Et ut ordine tota causa deducatur, illud prius ad iudicium reuocandum est, an licet diuitiae fortunæque non male fortassis Deus, malos inter bonosque promiscue dispertierit, non congruentius saltem, meliusque vni tantum ordini fuissent assignandæ. Nam quod non male, immo bene factum est, melius tamen fieri posse, non repugnat. Itaque irritemus distributionem Dei, omnibusque detrahamus bona omnia, immo & mala. Istud iam in quaestione est, non cui danda sigillatim, nam id nimis longe consultationis est, vti vidimus, sed cui ordini. An solis omnibusque bonis bona, an vero bonis omnibus solisque mala: malis autem an solis bona, an solis danda sint malis mala. Nihil enim amplius querendum restat, nec alia inuenietur diuisio, praeter eam que iam est. Proposita est quaestio. Igitur si placet, arbitrare; & vide an non in maximas implicandus sis difficultates. Dic tamen sententiam.

*Mala non
esse danda
solam*

Ego vero, inquis, sic statuo, manifestam esse rem. Bona certè omnia malis & peruersis omnibus ab iudicantur; malis vero & calamis,

calamitatibus, omnes omnia opprimuntur, sic iudicō sic statuo. Quis enim dementi arma non eripiat, quibus & se & alios in perniciem, iis male vñsus trahat? Ita tu, & quidem magnō fastu. At verò, an id è re publicā futurum putas, & verò etiam quod maximè spectandum est, è re Diuini Numinis? Quis id dubitat inquis? Imprimis ego. Si enim modò tot beneficiis affecti à Deo & implicati peccatores, nihilominus tam impudentes sunt, vt barbarum in mōrem ei rebelles sint, ciusque tam sancta imperia detrectent; in quantam eos impudentiam abituros censes, si injuriis à Deo se peti existimant; existimatur procul dubio, si cuncta sibi bona eripi persentiscant, & præterea non ferendis calamitatibus inuolui? Effrontem si se mendicus præbeat elemosynam lautam cum acceperit, benefactorisque sui oculos impudenter inuolat; quid demum ab hoc scelesto capite expectari potest, indonatus si dimittatur, & quod peius est multatus malè? Non igitur è re & honore Dei erit ista diuisio.

*probatur,
quia id nō
erit ex ho-
nore Dei.*

37. Non etiam è re publicā: si enim modò scelerati illi, cùm diuitiis abundant, nullaque vñlius rei nisi virtutis penuria premantur, de impietate tamen suā non erubescant, fraudes conscientiā reclamante nihilominus texant, iustitiam corrumpant, & pessimum: quid demum illi, paupertate extremā cogente, non audeant? Certè cùm in omne nefas projectum sit eiusmodi hominum genus, neque quid conscientia dicit, quidū Deus imperet, magnopere soleant attendere; furtis, latrociniis, & bonorum deprædationibus complebuntur omnia: sceleribusque tantis necessitas & paupertas, neque planè abs re, prætexetur.

*Nec ex bo-
no rei pu-
blica.*

38. Video, inquies, erravi. Bona itaque, ne pessimi evadant qui mali sunt, sceleratis omnibus, & solis posthac, & quidem profuse ingeruntur. Quid enim? Sæpius fanè me audisse memini, & verò etiam sacrae Paginæ testimoniis comprobari, diuitias ruinæ causam optimis cæteroquin viris, sæpenumerò præbuisse. Subtrahenda igitur ipsis est mali occasio, vt semper boni sint. Scelerati verò cùm iam orco se deuouerint, ea possideant, nocere possessori quæ possint. Neque si supplicia æterna, quæ euationi non sunt, malefactis angeant, curandum est magnopere.

*Non etiam
solis malis
bona dāta
sunt.*

39. Priori hic arbitratus non est absimilis. Quis enim non videat, quod si nemo diues esse posthac possit, nisi sit sceleratus, sceleratos illico fore quamplurimos, vt sint diutes? quod si

A a iam.

iam, ybi bonis esse datur & simul diuitibus, multi nihilominus,
vt diuitias sibi parent, sectantur scelera; quid tum futurum teris,
cum ad opes non nisi per scelera patebit via? Infinitos sanè à
recto virtutis tramite auocabit, & in omne virtutum naturam suam
proclives præcipitabit, certa illa sceleratissime solis proposita di-
uitiarum spes. Fatere igitur iterum errasse te, & nec malis solis
bona, nec adeò solis & omnibus mala esse ingerenda.

*Neque om-
nibus insta-
danda sunt
bona.*

At cum bonis tam benè affici videare, neque absque causa,
cum & te inter bonos sine dubio connumeres; quid illis agen-
dum censes? Diuites ne vis ut sint omnes, an ut omnes paupe-
res? Diutes, inquis, ut sint volo, & quidem omnes, & quidem
solos. Intelligo: rem tuam agis, & pro domo tuâ; nam inter
bonos te recenses. Sed pace tuâ dixerim, id certè Deo non erit
usque adeò honorabile: infinita enim hominum congeries, ho-
nestatis virtutisque partibus adiiciet animum, non ut Deo, sed
ut cupiditati sua obsequantur; nec iam piè Deo viuetur, sed di-
uitiis, quod rectè Augustinus admonet: *Permista* inquit ista Aug. 40.
temporalia Deus esse voluit: quia si bonis solis ea daret, putarent
dei mali propter hec colendum Deum; quod sanè si rectè expendis,
non est Deum colere sed se. Adde, si ut rectè paulo ante mo-
nuisti, boni omnes essent opulentii non omnes in arrepto virtutis
tramite perseveraturos. Multos enim diuitiae perdidere; ne-
que omnes eò sunt cerebri, ut sine capitib[us] vertigine fuentem
fortunæ auram sustinere diu queant. Augerent itaque, ut vides,
diuitiae bonis omnibus passim & temere concessæ malorum nu-
merum; & sic cum bonis fauemus, multiplicamus malos.

*Nec etiam
omnibus
bonis inge-
renda ma-
la.*

Pauperes ergo sunt omnes, inquier, ut semper boni sint. Vo-
tum bonum est fateor, sententia vero non bona, imò pernicioса
quam quæ maximè. Nam si nunc, quando boni, vitæ huius com-
modis opibusque minimè excluduntur, tam pauci tamen sunt
Dei in virtutemque qui sincerè colant, quam paucos tunc fu-
turos arbitraris, ybi sanctos mores certò certius consecutura est
misera paupertas? Quis tum malus peruersam vitam in melio-
rem commutabit, & ad bonorum ordinem transiliet, si illico ex
opulento futurus est miserrimus; & ut bonorum numero adseri-
batur, dimittenda videat bona, quæ non nisi sceleratissimas sit pos-
sidere? Interim si bonorum nemo diues, nemo potens, nemo
opulentus, quis Religionem souebit opibus? quis tempora con-
struer,

41.

Aug. 41.
Psal. 66.

struct, quis dotabit sacras domos, quis altaria procurabit? sceleratis scilicet impiisque hominibus ea incumbet cura. Ipsorum denique tyrannidi quis resistet, si nemo potens bonus? quis eorum impudentiae se opponet; quis virtutis defensor, quis solatio oppressis futurus, si nemo iustorum potentiae quidquam habeat, & omnis cum diuinitiis. vti fieri afferat, auctoritas, omnis vis, omne imperium, ad solos impios fuerint deuoluta? Vides iam certe, si quidquam vides, neque malos omnes pauperes esse posse, neque omnes diuites: & longè minus, bonos rectosque homines, aut omnes diuinitis cumulandos, aut paupertate omnes miseriisque esse implicandos.

42. **S** Video inquies, sed quid agam? quo me vertam? illud tantum occurrit modo, vt omnium fortunatum æqualis fiat inter omnes diuisio. omnes pari gradu sint, diuites, opulenti, & felices; nec quidquam sibi detractum obmurmurent boni, nec quidquam bonis adiectum conquerantur mali: tum sane cessabunt indignantium voces, obstructæque argento querimoniæ contitescerent. Verum utinam tacuisses tu ipse vir minimè male! Hic enim uero omnium quos protulisti dementissimus est arbitratus, prout secuturo Tractatu planum faciam. Omnia dum æquas, perturbas omnia; & dum cuncta facis paria, peruersis singula, & perdis vniuersa. Hæc porro deinceps, vti dixi: nam dissoluendus est in præsentiarum hic hominum cuncta arrodentium ridiculus Senatus. cras agentur reliqua.

43. Illud tantum nunc ex hac ratiocinatione colligam, abs re esse quod me aliena felicitas, aut etiam aduersa fortuna angat, sollicitum habeat, & perturbet. Rursus ab omni ratione longè alienos esse sermones illos, quibus otiosi quærimus, cur boni deprimantur, cur mali florent: cur si aliquibus bonis bene sit ab opibus, & à re domesticâ, non sit omnibus: cur si malis aliquando futurum est male, non sit modò: cur si plectantur aliqui, non castigentur vniuersi? illud enim iam ostensum est, vniuersim magno consilio & sanâ ratione, sceleratissimo cuique spes etiam maximas fuisse ingestas: deinde etiam, non alia quam tam inæquali malos inter bonosque sortitione, bona vel debuisse distribui, vel etiam potuisse. Quod si verò veritatis huius vim percipio, tum sane huius scelesti & illius impij, & tertij nimium insolentis felicitati, opibusque quantumcumque flagitosi homi-

*Itaque ne-
mini felici-
tatem
quam ba-
bet inuidet.*

nis facile acquiescam; nec inuidēbo. Si malus est, & tamen diues; diues est, vt bene faciat, & tandem bonus fiat: felicem facit Deus, vt ad suum obsequium beneficiis peruersum alliciat. Obsequi si noluerit, aliqua eius bona remuneratur, ne quidquam in extremo iudicio poslit exigere, vbi plena scelerum ineunda est ratio, & integra suppliciorum subeunda est mensura. Quid nunc nequidquam turbor? *intelligam in nonissimis eorum.* isthic toti mundo fiet perspicuum, non nisi prouidentissimā Dei ordinatione, hæc sic fuisse disposita; sanctissimāque prorsus ratione id factum, vt rationes Diuinæ Prouidentiæ nos laterent. Prouidentiam hanc colo, & securus sum; hanc venetor & felix sum; hanc adoro & beatus sum. Omnia sic fecit, qui fecit omnia; & vt faceret omnia, sic esse voluit singula. Lustus est, qui suum cuique dat; Prouidus, qui cuncta recte ordinat; Sanctus, qui non nisi rectissimum finem operibus suis habet præfixum. Itaque *Benedicite omnia opera Domini, Dominum,* & quidem *Ex hoc Nunc ignorantia meæ, usque in seculum.*



TRACTA-